

Tapak lupus sampah haram dibersihkan selepas siasatan

Alor Setar: Kerajaan negeri akan membersihkan tapak pelupusan sampah haram di Kampung Kemumbong, Sidam Kiri, Sungai Petani selepas siasatan selesai.

EXCO Industri dan Pelaburan, Kerajaan Tempatan dan Perumahan negeri, Tan Kok Yew, berkata siasatan itu dilakukan bersama Majlis Perbandaran Sungai Petani (MPSPK) dan Perbadanan Pengurusan Sisa Pepejal dan Pembersihan Awam (SWCorp) Kedah.

"Kita akan bersihkan tempat pelupusan sampah itu selepas siasatan siap. Perlu sedikit masa untuk melengkapkan siasatan secara terperinci.

"Seperti rumah terbakar, bomba perlu melakukan siasatan dahulu, selepas itu barulah kerja-kerja membersihkan sisa kebakaran dan tapak rumah dapat dilakukan, begitulah juga dalam kes ini, kita sedang lakukan perkara yang sama," katanya ketika dihubungi, semalam.

Sementara itu, ketika ditanya sama ada kerajaan negeri boleh merampas tanah terbabit, Kok Yew berkata, pihaknya tidak mempunyai kuasa untuk berbuat demikian.

Katanya, tanah hanya boleh dirampas sekiranya pemilik tanah tidak membayar cukai tanah dalam tempoh yang lama.

"Kerajaan negeri mahu ingatkan supaya orang ramai yang mempunyai tanah tidak membuat perkara yang sama kerana ia adalah satu kesalahan selain boleh memudaratkan alam sekitar termasuklah kepada penduduk sekitar," katanya.

BH sebelum ini melaporkan, kegiatan seorang pemilik tanah membenarkan sekurang-kurangnya 30 lori membawa muatan sampah sehari dilupuskan dengan bayaran RM20 setiap lori.

Kegiatan yang berlarutan sejak 11 tahun lalu itu, menyebabkan keadaan tidak selesa kepada kira-kira 500 penduduk kampung kerana ia mengeluarkan bau dan keadaan berhabuk kepada mereka.

Susulan itu, tindakan menyita kawasan dilakukan mengikut Seksyen 81(3) Akta Pengurusan Sisa Pepejal dan Pembersihan Awam.